

sind. Als erstlich/ daß sie mit einem vnersättlichen Lust vnd Begierde behafftet ist/ aller köstlicher vnd kostbarer Speisen. Darnach/ daß sie derselbigen nicht kan satt vnd voll werden/ vnd solten sie sich darüber frantk fressen: Vnd zum dritten/ daß sie auch nichts daran spahren / sondern wenden alles darauff/ vnd setzen alles Bedencken hindan / damit sie nur dieselbige bekommen mögen/ ob sie schon gänzlich darüber möchten verarmen: fressen sich also voll/ frantk/arm/ vnd in



die Höll hinein/ wie jener Storentiner/ Ciaccus genannt / welches auch sonst ein Saw heist/ der so viel Frösch gefressen/ daß er darüber geborsten vnd gestorben: derhalben ihn Dantes in seine Hölle also redend einführet/ da er vnder einem Dachtreiff im Koth gefressen:

*Voi Cittadin' mi chiamauate Ciacco,
Per la dannosa colpa della gola,
Hor come vedi, alla pioggia mi fiacco.*

Das ist:

Wol hätt man mich ein Saw genennt/
Dieweil ich alles hab verschwendt
Mit fressen/ sauffen ohne maß/
Drumb seht/ wie ich auch noch bin naß.

Beneben diesen gemeldten schädlichen Qualiteten/ befinden sich auch ein vnsägliches vnd vnzehliges hauff Kranckheiten vnd Schäden/ so diesem Laster gleichsamb auff dem Fuß nachfolgen/ darvon Thomas Aquinas in secunda secundæ, q. 148. da er fast alle die darauff folgende Zufäll zusammen faßt/ sagt: Daß das viel fressen den Verstand verfinstere/ vort wegen der Dünste/ so auß dem vberfüllten Magen in den Kopff steigen/ welches auch S. Hieronymus mit einem alten Sprichwort/ so bey den Griechen im brauch gewesen/ bestättiget/ nemlich: Venter pinguis non generat lensum tenuem: Ein feister vnd gefüllter Bauch macht nicht viel subtile Sinnen. So werdē auch die Affecten zur Vnordnung bewegt/ durch die Manigfaltigkeit der Speisen. Die Sprach wirdt verhindert/ vnd kriegt mancher den Krampff an der Zungen/ daß er nit mehr lallen kan/ wann er zu viel getruncken. Die Geberden werden verstelltet/ vnd trincket mancher Affen Wein/ daß sein muß lachen/ wer ihn ansiehet. Der Leib wird zur Vppigkeit/ vnd allerhand bösen Lüsten entzündet/ die Stärke desselbigen wird geschwächet/ der Beutel erschöpffet/ der Vorrath vergethet/ daß man endlich muß Mangel leyden/ vnd wie S. Augustinus sagt: Vbicunque querit caro refectiōnem, inuenit defectiōnem: Das ist: Es mangelt nirgend als allenthalben/ vnd will doch der Bauch keinen Mangel leyden/ derhalbē muß man auff allerhand Mittel bedacht seyn/ daß man demselbigen sein Theil verschaffe/ vñ solte man gleichsam aller Menschliche Affectē vergessen/ wie man in dē Evangelio siehet an dē reichen Schlem

Sssss ij mer/